



REPUBLIKA E SHQIPËRISË  
Komisioneri për Mbrojtjen e të Dhënave Personale  
Komisioneri

Nr. 64/1 Prot.

Tiranë, më 7/2/2014

U R D H E R

Nr. 04, datë 07/02/2014

Komisioneri për Mbrojtjen e të Dhënave Personale është autoriteti përgjegjës i pavarur, që mbikëqyr dhe monitoron, në përputhje me ligjin, mbrojtjen e të dhënave personale, duke respektuar garantuar të drejtat dhe liritë themelore të njeriut. Në kuadër të ushtrimit të punës së tij ky Autoritet mbikëqyr në mënyrë të vazhdueshme dhe të kujdesshme informacionet që jepen nga shtypi i shkruar dhe ai audioviziv. Objekt i kësaj mbikëqyrje është mbrojtja e të dhënave personale, jetës private dhe dinjitetit të subjekteve të kronikave të shtypit të shkruar dhe atij audioviziv.

Komisioneri për Mbrojtjen e të Dhënave Personale bazuar edhe në informacionin e datës 09.01.2014 të Autoritetit të Mediave Televizive (AMA) drejtuar këtij Autoriteti, verifikoi ligjshmërinë e mbledhjes, përpunimit dhe publikimit të të dhënave personale të subjekteve të të dhënave, nga kontrolluesi Televizioni "Ora News" gjatë transmetimit të kronikes lidhur me vrasjen e 4 personave në qytetin e Korçës.

Komisionerit për Mbrojtjen e të Dhënave Personale, konstaton se nga televizioni "Ora News" me datat 07 dhe 08 janar 2014 është transmetuar kronika lidhur me vrasjen e 4 personave në qytetin e Korçës. Gjatë transmetimit të kësaj kronike ndër të tjera thuhet se..... "*Gjithçka e kam bërë nga pasioni për , mësohet të jetë shprehur vrasësi, i cili ka pretenduar se fëmija ka ardhur në jetë pikërisht si fryt i kësaj lidhjeje, por që është mohuar në mënyrë kategorike nga familjarët e viktimave*"

Nga kronika jepen informacione të tilla si emri, mbiemri dhe aktiviteti i kryer nga i akuzuari, raporti i tij me viktimën, deklarimi që minoreni ishte lindur nga një "*raport jashtë martesor*", tregohet i saktë vendi i banimit etj. Në kronikë nuk kemi seleksionimin e informacioneve jo të domosdoshme në një përshkrim të ngjarjes të kryer në mënyrë që të respektohet privatësia e personave të përfshirë në këtë ngjarje.

Nga kjo kronikë i mituri në fjalë përveç faktit të humbjes të dy prindërve i duhet të njihet nga publiku dhe nga fakti se është një fëmijë i lindur jashtë martesë dhe si prind pretendohet të jetë pikërisht vrasësi i babait dhe nënës së tij. Pavarësisht faktit që nuk përmendet emri i të miturit faktet që sjell kronika lidhur me vendin e kryerjes së krimit, emrat e personave të vrarë, emrin e vrasësit dhe përshkrimi me imtësi i deklarimeve të vrasësit, bëjnë të mundur që i mituri të shndërrohet në një subjekt të identifikueshm për këdo që ka ndjekur këtë kronikë.

Komisioneri për Mbrojtjen e të Dhënave Personale rikujton se, e drejta e ligjshme për të raportuar fakte me rëndësi publike e ushtruar nga mediat duhet të shoqërohet gjithmonë nga vetëpërmbytja e gazetarëve për të qenë të kujdesshëm në publikimin e fakteve që mund të rëndojnë dhe dëmtojnë viktimat e këtyre ngjarjeve. Kjo përgjegjësi e gazetarit është akoma me e madhe kur kjo ngjarje ka të bëjë me një të mitur, të cilin në këtë mënyrë kronika e viktimizeve me tej, duke anashkaluar fenomenin, pra thelbin e kronikës dhe duke nxjerr në pah detaje, të cilat nuk ndikojnë në thelbin e asaj që duhet të arrihet nga transmetimi i kronikës.

Transmetimi i kësaj kronike me pohimet e mësipërme përbën një shkelje të rëndë të Kushtetutës së Shqipërisë, Konventës *“Për mbrojtjen e të drejtave të fëmijëve”*, ligjit nr.97/2013 *“Për mediat audiovizive në Republikën e Shqipërisë”*, ligjit nr. 9887, datë 10.3.2008 *“Për Mbrojtjen e të Dhënave Personale”*, i ndryshuar dhe akteve nënligjore të miratuara nga Komisioneri për Mbrojtjen e të Dhënave Personale.

Komisioneri për Mbrojtjen e të Dhënave Personale në udhëzimin nr. 9, datë 15/09/2010 *“Për rregullat themelore në lidhje me mbrojtjen e të dhënave personale në median e shkruar, vizive dhe audiovizive”* i ndryshuar, në kreun II pika 4 parashikon që *“Me qëllim të mbrojtjes së personalitetit, gazetari nuk publikon emrat e të miturve të përfshirë në raportet e lajmeve apo të japë detaje që mund të çojnë në identifikimin e tyre. Mbrojtja e personalitetit të fëmijës shtrihet, duke pasur parasysh cilësinë e lajmit dhe komponentët e saj, për faktet që nuk përbëjnë në mënyrë specifike krime. Ndalohet publikimi dhe përhapja e detajeve, me çdo mjet, të lajmeve apo fotove për të identifikuar një fëmijë të përfshirë në një krim”*.

Gjatë aktivitetit të tyre gazetarët duhet të bëjnë kujdes që të balancojnë nevojat e tyre për përdorimin e informacionit që përmban të dhëna personale me të drejtën e individit për respektimin e privatësisë së tij. Në rastin konkret e drejta e privatësisë së të miturit, është parësore në krahasim me të drejtën e kronikës, kronika nuk duhet të transmetojë informacione të tilla që të bëjë të mundur identifikimin e të miturit viktimë e kësaj ngjarje kriminale.

Sa më sipër:

Në zbatim të neneve 29, 30 dhe 32 të ligjit nr. 9887, datë 10.03.2008 *“Për Mbrojtjen e të Dhënave Personale”* i ndryshuar, si dhe nenet 107-109 të K. Pr. Administrative ;

## U R D H E R O J

1. Ndalimin e publikimit të mëtejshëm të të dhënave personale që lidhen me rastin e transmetimit të kronikes mbi vrasjen e 4 personave në qytetin e Korçës nga televizioni *“Ora News”*.
2. Fshirjen dhe shkatërrimin e të dhënave personale të cilat bëjnë të identifikueshëm të miturin e përfshirë në kronikën mbi vrasjen e 4 personave në qytetin e Korçës të transmetuar nga televizioni *“Ora News”*.
3. Për plotësimin e këtyre detyrimeve të njoftohet me shkrim pranë Komisionerit për Mbrojtjen e të Dhënave Personale.

4. Në rast mospërbushje të këtyre detyrimeve, Komisioneri vepron sipas nenit 30, pika 2 të ligjit nr. 9887 datë 10.03.2008 "Për Mbrojtjen e të Dhënave Personale" i ndryshuar, sipas të cilit.. "Komisioneri në rast shkeljesh serioze të përsëritura ose të qëllimshme të ligjit nga një kontrollues ose përpunues,veçanërisht në rastet e përsëritura të rekomandimeve të tij,vepron sipas nenit 39 të këtij ligji dhe e denoncon publikisht ose e raporton çështjen në Kuvend dhe në Këshillin e Ministrave".
5. Ky urdhër hyn në fuqi menjëherë

**KOMISIONERI**

**FLORA ÇABEJ (POGAÇE)**

